



Lajmëtari i Radio Marisë

Shkurt 2011

Viti III, Nr. 2

Në këtë numër do të lexoni

Ati i Shenjtë Gjon Pali II shpallet i lumtur	2
Pyetjet e dëgjuesve drejtuar redaksisë	3
Dëgjuesit për Radio Marinë	4
Shenjtëria e të rinjve	4

**Lajmëtari i Radio Marisë
është organ i
Shoqatës Radio Maria.**

Tiranë

Rr. Papa Gjon Pali II, Nr. 4

Fushë Kërçik

Babrru, Paskuqan

Tiranë, Shqipëri

+355 4 2 346 346

Shkodër

Sheshi Papa Gjon Pali II

Shkodër, Shqipëri

+355 22 24 08 52

E-mail

info@alb.radiomaria.org

Përgjegjës

Don Prekë Lazraj

**Radio Maria,
Hiri i Hyjit në shtëpinë tënde,
mund të dëgjohet në:**

Brëshen e rrethina

FM 100.7 MHz

Tiranë, Durrës, Kavajë, Berat

FM 91.4 MHz

Shkodër, Podgoricë, Ulqin

FM 102.2 MHz

Lezhë, Laç të Kurbinit, Mamurras

FM 89.6 MHz;

Pukë, Fushë Arrëz, Tropojë,

Kukës dhe Kosovë

FM 90.0 MHz

www.radiomaria.al

EDITORIAL

Të dashur miq,

Ditëve të fundit të vitit të kaluar dhe ditëve të para të këtij viti pata mundësi të takoj shumë njerëz qoftë nga vendi, qoftë nga ata që për festa kanë ardhur nga vendet ku punojnë. Pata mundësi që të takoj ata të cilët ju vazhdimisht i nxitni për ta dëgjuar zërin e ëmbël të Radio Marisë dhe për ta pasuruar veten me vlerat shpirtërore që Radio Maria përpiqet t'i transmetojë gjatë 24 orëve.

Një pjesë e takimeve ishin shumë të përmallshme, saqë shumë herë u përcollën me lot gëzimi për paqen dhe qetësinë që Radio Maria e sjell në jetën e mijëra e mijëra njerëzve dhe familjeve brenda dhe jashtë Shqipërisë.

Na gëzon fakti se numri i mbështetësve të Radio Marisë rritet nga dita në ditë në përputhje me synimet dhe projektet që vetë Zoti i ka me Radio Marinë dhe me përhapjen e dëgjueshmërisë së saj në Shqipëri dhe në botë.

Mirëpo, fatkeqësisht ka edhe shumë të tjerë, të cilët duke mos përballuar kërkesat që Hyji ua bën duke kërkuar ndryshimin e jetës së tyre dhe kthimin, nuk gëzojnë një gjendje të mirë shpirtërore dhe shumë herë janë të acaruar në brendi, sepse nuk mund t'i largohen mëkatit dhe të pavërtetës në të cilën jetojnë. Këtyre vëllezërve dhe motrave iu premtojmë se nuk do të pushojmë së ndërmjetësuarit me lutjen tonë para Zotit që kthimi i plotë i tyre të jetë sa më i afërm e bashkimi i tyre me Hyjin i plotë!

Shumë prej vëllezërve dhe motrave tona përplot me admirim shikojnë punën e jashtëzakonshme që bëjnë vazhdimisht vullnetarët e shumtë të Radio Marisë në të gjitha fushat për të përballuar çdo sfidë të mundshme që kërkon puna.

Njëri prej tyre tha: «Ka vite të tëra që hetoj se diçka i mungon shpirtit tim. Ka vite që përpiqem që këtë mungesë të shpirtit tim ta plotësoj me këtë apo me një gjë tjetër, por

zemra ime mbeti plotësisht e zbrazët. Para një viti e gjysmë pasi që një i afërm i imi më tregoi se ekzistonte Radio Maria, fillova ta dëgjoj. Duke e dëgjuar dhe duke e bërë pjesë të jetës sime kërkesën që më bënte Radio Maria me programin e saj, çdo gjë filloi të ndryshojë në jetën time e pastaj edhe në familjen time. Në jetën e pjesëtarëve të familjes sime filloi të kthehet përsëri paqja dhe gëzimi për njeri-tjetrin, duke i përjashtuar moskuptimet dhe ngatërresat që ishin vendosur mes nesh dhe po bëheshin gjithnjë e më të padurueshme. Zoti filloi të zotërojë përsëri në shtëpinë tonë. Ai qëndronte duke prituri para dere, por ne nuk kishim kohë ta dëgjonim! E falënderoj që tashmë ka filluar të na përcjellë në të gjitha veprimtaritë e secilit anëtar të familjes sime».

Një tjetër tha: «Radio Maria është çështje e bukurisë dhe e pasurisë, e cila i ofrohet secilit dëgjues duke komunikuar në mënyrë të drejtpërdrejtë me të. Kjo nuk krahasohet me radiot e tjera, nuk të le indiferent, ndërhynd drejtpërdrejt në jetën tonë. Mrekulli, Zoti po përdor një mjet kaq të varfër për të na ndryshuar në thelb. Ju që punoni në Radio Marië nuk mund ta keni as idenë më të përafërt për ato gjëra që jeni duke bërë në zemrat tona».

Vërtet, ne njëfarë ideje e kemi, që në të vërtetë nuk është ide, por është dashuri, dashuria e pakufishme që Hyji na komunikon neve dhe juve përmes valëve të Radio Marisë.

Të dashur miq, ju të gjithë jeni pjesë e kësaj dashurie që po përhapet në të katër anët e botës si dhuratë e të gjithëve për secilin përmes Radio Marisë. Uroj që pjesëmarrja jonë të jetë çdo ditë e më e madhe, më bindëse që të gjithë së bashku të jetojmë në dashuri dhe prej Dashurisë, në mënyrë që të përgjigjemi ashtu si ka nevojë secili vëlla dhe secila motër në popullin tonë.

Don Preka

ATI I SHENJTË GJONI PALI II SHPALLET I LUMTUR



Papa Benedikti XVI e autorizoi Kongregatën për shpalljen e shenjtërve që të shpallë dekretin për mrekullinë që i përshkruhet ndërmjetësimit të Shërbëtorit të Hyjit Gjonit Palit II.

Me këtë veprim përmbillet çështja që i paraprin ritit Lumturimit të Shërbëtorit të Hyjit Gjonit Palit II. Lumturimi do të bëhet në Vatikan më 1 maj 2011, të dielën pas Pashkëve, ditën e Mëshirës Hyjnore, kur Ati i shenjtë, Benedikti XVII, do ta shpallë të Lum.

Ati i shenjtë Gjoni Pali II vdiq më 2 prill 2005. Çështja që të shpallet i lum dhe i shenjtë, pas lejes së veçantë që dha Ati i shenjtë Benedikti XVI, e jo siç kërkon e drejta kanonike, pas pesë vjetëve, filloi pa u plotësuar pesë vjet nga vdekja e tij. Arsyeya e këtij përjashtimi është fama e madhe e shenjtërisë që e kishte Ati i shenjtë Gjoni Pali II në mbarë botën në mesin e të gjithë njerëzve. Ai e gëzoi famën e shenjtërisë edhe sa qe gjallë, sepse menjëherë pas vdekjes së tij besimtarët e bashkuar në Sheshin e Shën Pjetrit në Romë kërkuan njëzëri: «Menjëherë i shenjtë». Në të gjitha çështjet e tjera të këtij procesi, Kisha zbatoi ligjet kanonike për shpalljen e shenjtërve.

Që nga qershori i vitit 2005 e deri në prill të vitit 2007 u krye çështja e gjyqit dioqezan në dioqezën e Romës, si edhe në dioqezat e tjera në të cilat u bënë hetimet për jetën dhe virtytet, si dhe zërin

e shenjtërisë së Gjonit Palit II. Vërtetësinë e ecurisë kanonike e pranoi Kongregata për çështjen e shenjtërve me dekretin e veçantë më 4 maj 2007. Në qershor të vitit 2009, pasi që e shqyrtuan çështjen, nëntë këshilltarë të teologëve të kësaj Kongregate dhanë mendimin e vet pozitiv për virtytet heroike të Shërbëtorit të Hyjit. Pasi që në dhjetor të të njëjtit vit Kardinalët ipeshkvi të Kongregatës për çështjen e shenjtërve dhanë gjithashtu mendimin e vet pozitiv për të njëjtën çështje, atëherë më 19 dhjetor 2009 Papa Bendikti XVI dha lejen që të shpallet dekreti për virtytet heroike.

Në të mirë të lumturimit të Shërbëtorit të Hyjit Gjonit Palit II, postulatura për çështjen e shenjtërve ia paraqiti Kongregatës së çështjes së shenjtërve shërimin e sëmundjes së parkinsonit që e mori rregulltarja franceze Motër Maria Simon Pjer Norman.

Aktet e tërësishme të hetimit kanonik që u bënë në mënyrë të rregullt, së bashku me mendimin e specializuar mjekësor paraparak, u dorëzuan më 21 tetor të vitit 2010 që këshilli mjekësor i Kongregatës për çështjen e shenjtërve të jepte mendimin për këtë çështje. Specialistët e kongregatës, pasi që e studiuuan në mënyrë të hollësishme rastin dhe dëshmitë që u bënë gjatë ecurisë dhe krejt dokumentet, u shprehën në të mirë të shërimit të mrekullueshëm që ndodhi e që nuk shpjegohet shkencërisht. Teologët këshilltarë, pasi që morën mendimin dhe përfundimet që bënë mjekët më 14 nëntor 2010, filluan që të jepnin mendimin teologjik dhe njëzëri pranuan se shërimi erdhi falë ndërmjetësimit të Shërbëtorit të Hyjit Gjonit Palit II.

Në fund, më 11 janar 2011 u caktua mbledhja e zakonshme e kardinalëve ipeshkvi të Kongregatës për çështjen e shenjtërve, të cilët përsëri njëzëri dhanë gjykimin pozitiv, duke pohuar se Motër Maria Pjer Simon u shërua që Hyji të nxirrte në dritë veprën që ndodhi në mënyrë të pashpjegueshme shkencërisht, pasi ajo e kërkoi ndërmjetësimin e Atit të Shenjtë Gjonit Palit II, ndërmjetësimit të të cilit nuk iu drejtua vetëm kjo motër, por edhe shumë njerëz të tjerë.

Lumturimi i Atit të shenjtë, Shërbëtorit të Hyjit, Gjonit Palit II, do të bëhet më 1 maj 2011, në Vatikan.

CILI ËSHTË KUPTIMI I SHKRONJAVE IHS?

Në shumë objekte jashtë kishave, por edhe brenda në kisha, shohim shkronjat IHS. Çfarë domethënie kanë këto shkronja në të vërtetë? Këto shkronja i shohim gjithashtu edhe në objektet dhe veshjet që shërbejnë në kultin e krishterë. Kam pyetur shumë besimtarë që zakonisht shkojnë në kishë, por askush nuk ma dha ndonjë përgjigje lidhur me këto shkronja. Shpresoj të marr një përgjigje përmes valëve të Radio Marisë ose edhe të shkruar në «Lajmëtarin e Radio Marisë».

Faleminderit, Emanueli.

Përgjigja e Redaksisë

Shkronjat IHS janë tri shkronjat e para të Emrit të Jezusit siç shkruhet në gjuhën greke emri i Jezusit me shkronja të mëdha ΙΗΣ (OYΣ) dhe kemi mundësi t'i lexojmë JEZUS. Pra, shkronjat IHS paraqesin në gjuhën greke tri shkronjat e para të emrit të Jezusit.

Gjatë historisë së Kishës, këto shkronja janë lexuar si të ishin shkronja të alfabetit latin. Kështu shkronjat IHS që janë fillimi i fjalës ΙΗΣΟΥΣ (JEZUS), që latinisht do të duhej të shkruhej IES, ose JES, që në këtë mënyrë ta kishim të qartë se janë shkronjat e para të emrit Jezus.

Mirëpo, më vonë për arsye të leximit të shkronjave greke si shkronja latine kemi shpjegimet e gabueshme të këtyre tri shkronjave, por që kanë domethënie shumë të bukur dhe shumë domethënëse, si për shembull: IHS = Iesus Hristos Salvator (Jezu Krishti Shëlbues); ose Iesus Hominum Salvator (Jezusi Shëlbues i njerëzve); Iesus Homo Sanctus (Jezusi njeri i shenjtë) ose In Hoc Salus (Në Këtë është shëlbimi). Secili prej këtyre shpjegimeve shpreh një pohim të vërtetë për Jezusin, por domethënia e parë është domethënia e vërtetë e shkronjave IHS.

PËRSE MESHTARËT NGUTEN AQ SHUMË NË RRËFIM?

Dikur e pata rrëfyesin e rregullt dhe prej tij mësova shumë. Edhe sot e kësaj dite do të dëshiroja ta kem, por... Para pak viteve patëm meshtarë, të cilët pasi rrëfenim mëkatet tona, kishin kohë të na thoshin ndonjë fjalë dhe të na japin ndonjë këshillë. Sot, në çastin kur i rrëfejmë mëkatet, nëse më lejohej kjo ta bëj deri në fund, më duhet të hap veshët për të dëgjuar se çfarë më thotë meshtari në shpejtësi dhe cilën pendesë do të më japë. E ende pa e thënë as gjysmën e «Punës së pendimit» e shoh duke bërë shenjën e kryqit, në shenjë të faljes së mëkateve...

Ma merr mendja se nuk jemi duke u rrëfyer në kohë lufte, kur jeta është në rrezik dhe na duhet që rrëfimin ta bëjmë sa më parë! Jam plotësisht i vetëdijshëm se rrëfyesi nuk mund të japë shumë këshilla gjatë rrëfimeve për Pashkë kur ka shumë njerëz që rrëfehen, por gjithashtu është e vërtetë se disa meshtarë nuk duhet të rrëfejnë një grup të madh të besimtarëve për dhjetë minuta! Po të rrëfeheshim pak më mirë, besoj se edhe jeta jonë si të krishterë do të ishte më e mirë... E di, rrëfimi në shpejtësi nuk e humb vlerën, por... Më besoni se nuk dua që me këtë pyetje timen të provokoj, as të lëndoj askënd, kërkoj vetëm një qëndrim tjetër gjatë mbarështimit të sakramentit të rrëfimit.

Marku, rrethi i Lezhës.

Përgjigja e Redaksisë

Duke mos dyshuar aspak në qëllimin e mirë që keni po e botojmë letrën tuaj në të cilën kërkon përgjigje.

Nuk është aspak mirë, as nuk është në përputhje me mësimin e Kishës që sakramenti i rrëfimit të thjeshtësohet vetëm në rrëfim të mëkateve. Pikërisht për këtë gjë është ndërruar emri i këtij sakramenti duke e quajtur «Sakrament pajtimi», që të hiqet theksi prej rrëfimit të mëkateve në mënyrë mekanike në rrëfyestore dhe duke lënë në hije elementet e tjera të rëndësishme të këtij sakramenti të shenjtë, të cilët i përkasin procesit që fillon me shqyrtimin e ndërgjegjes, njohjen e mëkateve, pendimit për të ardhur tek zgjidhja sakramentore e mëkateve në sakramentin e pajtimit, si edhe të kryerja e pendesës që marrim.

Këshilla që ju kërkon në këtë sakrament, është shumë e nevojshme, sidomos në pjesën e parë të këtij procesi, d.m.th. në njohjen e mëkateve personale, për pendimin personal pas të cilit mund të marrim faljen e mëkateve nga Hyji dhe njerëzit.

Kisha që është plotësisht e vetëdijshme për këtë nevojë, në Koncilin II të Vatikanit, duke dashur që vëmendja e besimtarëve të përqendrohet në leximin, shpjegimin dhe kuptimin e fjalës së Hyjit, që është më se e nevojshme në këto raste, e ka caktuar përgatitjen e përbashkët për të kryer sakramentin e pajtimit. Më vjen keq që kjo gjë që cakton Kisha, përdoret aq rrallë ndër ne, pra përgatitja që ta kryejmë si duhet sakramentin e pajtimit. Në këtë rast besimtarët dhe meshtarët do të bëheshin më të vetëdijshëm për krenimin e këtij sakramenti pa u ngutur fare.

DËGJUESIT PËR RADIO MARINË

Miq të dashur, siç e dini të gjithë, në programet e Radio Marisë dëgjuesit marrin pjesë për çdo ditë në mënyrë aktive. Ditën e mërkurë dhe ditën e premte ata i shprehin vlerësimet dhe vërejtjet që kanë lidhur me programet që Radio Maria transmeton gjatë 24 orëve. Këtyre dy ditëve, por edhe gjatë gjithë javës, kemi ndërhyrje të dëgjuesve ndër më të ndryshmet. Po të shkruheshin të gjitha, faqet e «Lajmëtarit të Radio Marisë» do të duhej të shtoheshin shumë. Në kohën e fundit mu ngulitën në zemër dy shprehje domethënëse që na i dhuruan dëgjuesit tanë:

«Pa Radio Marinë ndjehem si nata pa hënë; si fëmija pa nënë».

«Pas Familjes së shenjtë, Zoti na ka dhuruar Radio Marinë, e cila na mbush me praninë e tij!»

Urojmë me gjithë zemër që Radio Maria të jetë po kaq e rëndësishme edhe për të gjithë dëgjuesit e tjerë, e të bëhet një bashkudhëtare drejt Zotit edhe për shumë shqiptarë të tjerë që kanë etje për të Vërtetën.

Leonida

SHENJTËRIA E TË RINJVE

Jeta jonë e re është dhuratë e Hyjit dhe si e tillë nuk duhet dëmtuar. Ja pse Radio Maria filloi emisionin «Shenjtërit mes nesh». Ti i ri, ti e re, ju fëmijë keni vlerë të madhe në sytë e Hyjit. Ai do që talentet tuaja t'i shndërroni në burim dashurie për të tjerët që për ju të bëhen fryt lumturie. Të dish dëshirën e Zotit nuk mjafton për ta realizuar atë. Por, duhen njohur shembujt e shumtë të të rinjve, që janë përvoja të mrekullueshme prej të cilave mund të marrë shumë secili prej nesh. Kemi nevojë të bindemi që rruga e shenjtërisë është e vetmja rrugë që duhet ndjekur. Atëherë, a duhet të vazhdojmë të jetojmë ashtu siç kemi jetuar deri më tani?

Nëse fjalët nuk arrijnë të na bindin, shembulli jetësor i njerëzve do të na bindë patjetër. Kështu, të vetëdijshëm se përsosmëria arrihet me vështirësi, të vazhdojmë pak nga pak të luftojmë për lumturinë tonë. Tashmë e dimë se të jesh i shenjtë nuk është privilegj për pak njerëz, por detyrë për të gjithë. Kjo nuk duhet të na trembë. Mos harro: Zoti nuk të detyron. Ai vetëm do. T'i afrohem dhe t'i gëzohemi DASHURISË së tij!

Laura

KALENDARI KATOLIK I RADIO MARISË 2011

Të dashur dëgjues të Radio Marisë,

Radio Maria ofron për të gjithë ju dhe të afërmit tuaj Kalendarin Katolik për vitin 2011. Me rastin e mbylljes së procesit për Çështjen e Kanonizimit të 40 Martirëve Shqiptarë, këtë kalendar ia kemi kushtuar jetës dhe veprës së tyre për fe dhe për atdhe.

Në secilin muaj ju do të mund të njiheni shkurtimisht me jetën e 3-4 Shërbëtorëve të Hyjit, që vuajtën nën regjimin komunist për shkak të fesë katolike. Ata janë mbjellë porsia ajo kokrra e grurit në tokën shqiptare dhe gjaku i tyre ndërmjetësoftë gjithmonë pranë Hyjit për rritjen e besimit të krishterë ndër shqiptarë. Le të mësojmë prej martirëve tanë se si ta duam dhe ta mbrojmë me vetëmohim fenë e Krishtit që e morëm prej Apostujve.

Le t'i njohim martirët dhe ndërmjetësit tanë duke e marrë kalendarin e Radio Marisë në shtëpitë tona. Gjithashtu, aty do të gjeni edhe të gjitha festat e urdhëruara, të martat e Shna Ndout dhe shenjtërit e çdo dite.

Kalendarin katolik të Radio Marisë për vitin 2011 mund ta gjeni te Radio Maria në Shkodër dhe Tiranë, si edhe në disa famulli të ndryshme në vend. Mund të na kontaktoni në numrat e telefonit që janë në faqen e parë për më shumë informacione lidhur me blerjen e kalendarit.



Kalendar Katolik

2011

Viti Meshtarak

PRO CREDIT BANK

LLOGARIA NË EURO 127837030002

Kodi SWIFT: FEFAALFR

IBAN: AL 05209111240000127837030002

LLOGARIA NË LEK 127837030101

Kodi SWIFT: FEFAALFR

IBAN: AL 48209111240000127837030101

INTESA SAN PAOLO BANK

LLOGARIA NË EURO 1043631803

Kodi SWIFT: USALALTR

IBAN: AL 25208110080000001043631803

LLOGARIA NË LEK 1043631801

Kodi SWIFT: USALALTR

IBAN: AL 79208110080000001043631801

NË ZVICËR ME 5 FRANGA

Duke telefonuar në numrin:

0900123411

Në bankën CREDIT SUISSE

RADIO MARIA

LLOGARIA NË CHF 361173-10-1

IBAN: CH1804835036117310001